



Bosna i Hercegovina
Federacija Bosne i Hercegovine
Kanton Sarajevo

PRAVCI DJELOVANJA
VLADE KANTONA SARAJEVO
U 2018. GODINI

- EKSPOZE PREMIJERA -

Adem Zolj

Sarajevo, april 2018 godine

SADRŽAJ

1. UVODNE NAPOMENE
2. ZADACI I PRAVCI DJELOVANJA VLADE U 2018.g.
3. MINISTARSTVO FINANSIJA
4. MINISTARSTVO KOMUNALNE PRIVREDE I INFRASTRUKTURE
5. MINISTARSTVO KULTURE I SPORTA
6. MINISTARSTVO PRAVDE I UPRAVE
7. MINISTARSTVO PRIVREDE
8. MINISTARSTVO PROSTORNOG UREĐENJA, GRAĐENJA I ZAŠTITE OKOLIŠA
9. MINISTARSTVO SAOBRAĆAJA
10. MINISTARSTVO UNUTRAŠNJIH POSLOVA
11. MINISTARSTVO ZA BORAČKA PITANJA
12. MINISTARSTVO ZA OBRAZOVANJE, NAUKU I MLADE
13. MINISTARSTVO ZA RAD, SOCIJALNU POLITIKU, RASELJENA LICA I IZBJEGLICE
14. MINISTARSTVO ZDRAVSTVA
15. ZAKLJUČAK

1. UVODNE NAPOMENE

Proces globalizacije, sve oštrija konkurencija, tranzicioni efekti kao i brz tehničko-tehnološki razvoj dovode do potrebe za stalnim praćenjem načina rada i prilagođavanja novonastalim situacijama. Zadatak svake organizacije jeste oblikovanje strukture, koja će biti u mogućnosti da se u svakom momentu prilagodi potencijalnim izazovima koji dolaze iz bližeg ili daljnjeg okruženja. Poslovne sposobnosti svakog čovjeka te timski rad od neizmjerne su važnosti za uspješno poslovanje organizacije, ali ipak u prvom planu trebalo bi da bude sama organizacija. Ljudski resursi kao cjelina, uklopljeni u dobar tim mogu da donesu samo pozitivne rezultate, a individualne sposobnosti ne bi trebalo da se guše, niti izdižu u visine. Snaga organizacije leži u dobrom upravljanju ljudskim resursima i njihovom organiziranju prema principu timskog rada. SNAGA svakog tima leži u dobroj organizaciji i u potpunoj integriranosti svih članova tima.

Kanton Sarajevo kojeg čini devet općina od kojih četiri čine Grad Sarajevo, predstavlja politički, ekonomski, obrazovni, kulturni, administrativni i duhovni centar države Bosne i Hercegovine i njezinu glavnu integrativnu snagu.

2. ZADACI I PRAVCI DJELOVANJA VLADE U 2018.g.

Rad Vlade Kantona Sarajevo bit će referiran na još jače reformske procese našeg kantona u svim resorima, stvaranje povoljnijeg ambijenta za realizaciju razvojnih i kapitalnih projekata između ostalog u oblasti saobraćajne infrastrukture, komunalne privrede, obrazovanja, razvoja turizma, javne uprave, zdravstva, zaštite okoliša.... Veoma bitan segment djelovanja trebalo bi da bude i sigurnosna situacija u Kantonu.

Vlada Kantona Sarajevo će u svom radu poštivati načela:

- Transparentnosti rada,
- sigurnosti,
- pravednosti,
- timskog rada,
- odgovornosti,
- zapošljavanja – otvaranja novih radnih mjesta.

Princip transparentnosti rada podrazumijeva javno djelovanje Vlade koju karakterizira otvorenost, odnosno spremnost da se podaci o radu što je moguće više učine dostupnim javnosti i široj društvenoj zajednici. Transparentnost predstavlja jedno od najboljih sredstava za prevenciju korupcije i raznih drugih oblika zloupotrebe.

Princip sigurnosti podrazumijeva više aspekata. Primarni cilj je sigurnost u očuvanju ustavnog i demokratskog poretka, sigurnosti građana i imovine, a značajnu pažnju posvetit ćemo pitanju ekonomsko-socijalne sigurnosti u smislu lične sigurnosti zaposlenika za nesmetano, ali savjesno i efikasno obavljanje poslova na radnom mjestu. Vlada će kroz otvaranje novih radnih mjesta i poticanje redovnog i adekvatnog izmirenja svih zakonom propisanih obaveza prema radnicima, promicati ovaj princip.

Princip pravednosti će prožimati sve aspekte rada ove Vlade Kantona Sarajevo. Poštivanje ovog principa dokazaćemo kroz dizajniranje i provedbu programa podrške i kroz izvršenje Budžeta za 2018.g. Poštivanje ovog principa ogledaće se i u transparentnosti rada Vlade, kroz stvaranje uvjeta da građani komuniciraju s javnim sektorom. To bi bilo na jednom mjestu putem Interneta, portala u kojem bi trebalo da budu objedinjene informacije o radu Vlade i ministarstava, informacije o javnim

uslugama, javnim nabavkama, javnim pozivima i projektima, te drugim korisnim informacijama za građane.

Princip timskog rada. Snaga organizacije leži u dobrom upravljanju ljudskim resursima i njihovom organiziranju prema principu timskog rada a snaga tima leži u dobroj organizaciji i u potpunoj integriranosti svih članova tima.

Princip odgovornosti odnosi se na pravni okvir i okvir izvještavanja, organizacionu strukturu, strategiju, procedure i mjere kojima se osigurava ispunjavanje svoje zakonske obaveze.

Princip zapošljavanja podrazumijeva realizaciju onih programa koje će Vlada Kantona Sarajevo u ostatku mandatnog perioda podržati i implementirati. Cilj jeste stvaranje poslovnog ambijenta koji je preduvjet za otvaranje novih radnih mjesta. Finasijski pomagati napredne poslovne programe koje implementiraju mlade osobe.

U ovoj godini, naše aktivnosti će biti posebno usmjerene na realizaciju nekoliko kapitalnih projekata:

- Početak realizacije projekta SMART CITY – „ Sarajevo pametan Grad“
- Rad na uspostavi elektronskog sistema za upravljanje protokolom;
- Završetak izgradnje Južne longitudinalne (od II do IV transferzale);
- Početak izgradnje I i IX transferzale;
- Stvaranje uvjeta za početak izgradnje parking prostora;
- Stvaranje uvjeta za početak rekonstrukcije tramvajske pruge;
- Nastavak izgradnje biciklističkih staza;
- Ubrzanje dinamike rekonstrukcije vodovodne mreže u Kantonu;

-
- Stvaranje uslova za sistemsko rješavanje problema pasa lualica;
 - Smanjenje upotrebe energenata koji zagađuju okoliš, realizacija projekata za povećanje energijske efikasnosti i „zelenih fasada“;

Vlada Kantona bit će čvrsto opredijeljena za:

- Reformu javne uprave, ekonomske reforme i promociju Kantona Sarajevo kao perspektivnog poslovnog regiona, otvorenog i sigurnog za nove investicije i nova zapošljavanja uz prednost za djecu šehida i poginulih boraca,
- Odlučnu borbu protiv kriminala i korupcije u svim oblastima i potpunu ličnu i imovinsku sigurnost svih građana,
- Postizanje evropskih standarda i kvaliteta u obrazovanju, sudstvu, zdravstvu, sigurnosti, privredi, kulturi, sportu i drugim segmentima,
- Zaštitu životnog standarda i podizanje nivoa socijalne osjetljivosti prema penzionerima, starijim, iznemoglim, invalidnim i oboljelim licima, kao i drugim licima u stanju socijalne potrebe,
- Osiguranje međunarodnih standarda poštivanja ljudskih prava i sloboda, Ustava BiH, Ustava F BiH i Ustava Kantona Sarajevo te tradicionalnih vrijednosti multietničkog, multireligijskog i multikulturnog BiH društva, sa Sarajevom kao najznačajnijim evropskim simbolom tolerancije i jedinstva različitosti.

3. MINISTARSTVO FINANSIJA

Ministarstvo finansija vrši upravne i stručne poslove utvđene ustavom, zakonom i drugim propisima, koji se odnose na ostvarivanje nadležnosti Kantona u oblasti finansija i poslove budžetske inspekcije.

Glavni zadatak je voditi politiku osiguranja stabilnih prihoda i provođenje fiskalne discipline.

Stalnom analizom prihoda, utvrditi gdje prihodi odstupaju od planiranih i blagovremeno poduzimati mjere.

Voditi računa o finansijskim transakcijama u smislu učinkovitosti i svrsishodnosti trošenja novca.

Racionalnim poslovanjem ostvariti uslove za smanjivanje naslijeđenog deficita.

Pri reviziji finansijskog poslovanja, potrebno je uraditi i reviziju informacionog sistema (IT revizija).

4. MINISTARSTVO KOMUNALNE PRIVREDE I INFRASTRUKTURE

U ministarstvu komunalne privrede i infrastrukture potrebno je konačno krenuti u proces korporativnog restrukturiranja kantonalnih javnih komunalnih preduzeća sa konačnim opredjeljenjem „Osnivanje Sarajevskog holdinga“, DA ili NE.

Također, potrebno je uspostaviti procedure za upravljanje integralnim sistemom komunalne javne infrastrukture Kantona Sarajevo između ministarstva, preduzeća i korisnika.

Jedno od težišta će biti i pokretanje investicionih procesa kroz primjenu Zakona o javno-privatnom partnerstvu, a u cilju realizacije razvojnih projekata i postizanja boljeg nivoa usluga za građane u Kantonu Sarajevo.

Radi prevazilaženja nagomilanih problema komunalne privrede, morat će se krenuti u reformske procese u cilju ozdravljenja i normalnog funkcioniranja komunalnih subjekata.

Ti procesi će pomoći ekonomski samoodrživo poslovanje preduzeća koji moraju biti praćeni i adekvatnom politikom subvencioniranja socijalno ugroženih kategorija građana.

5. MINISTARSTVO KULTURE I SPORTA

U cilju osiguranja adekvatnog društvenog tretmana kulture i kulturno-historijskog naslijeđa u Kantonu Sarajevo, aktivnosti će biti usmjerene na:

- Dodjela priznanja istaknutim umjetnicima od značaja za Kanton Sarajevo i BiH;
- Pružanje materijalno-finansijske pomoći za rad nacionalnih kulturno-prosvjetnih društava, udruženja i ustanova kulture sa višim nivoima vlasti
- Podržavanje međunarodnih kulturnih manifestacija u Kantonu Sarajevo;
- Zalaganje za poreske olakšice pri obavljanju kulturne djelatnosti;
- Unaprijediti i ubrzati aktivnosti na očuvanju, zaštiti i rekonstrukciji kulturno-historijskih objekata u Kantonu Sarajevo.

U oblasti sporta aktivnosti će biti usmjerene na:

- Kreiranje baze podataka nadarenih i perspektivnih sportista školskog uzrasta;

-
- Osiguranje materijalno–finansijskih i tehnoloških uvjeta i finansijskih sredstava za realizaciju najboljih projekata iz oblasti sporta u školama;
 - Davanje sveobuhvatne podrške osobama sa invaliditetom za ravnopravno bavljenje sportskim aktivnostima;
 - Unaprijeđenje sistema kontrole i revizije izdvajanja i utroška novca u oblasti sporta;
 - Zakonsko stimuliranje ulaganja u sport kao poslovnu privrednu djelatnost;
 - Kontinuirana finansijska ulaganja u infrastrukturu iz oblasti sporta;
 - Poduzimanje mjera za rješavanje problema nasilja na sportskim događajima;

6. MINISTARSTVO PRAVDE I UPRAVE

Podržavat ćemo aktivnosti na strukturalnom dijalogu o pravosuđu i provođenje reformi pravosuđa u Kantonu Sarajevo i Bosni i Hercegovini u skladu sa međunarodnim i EU standardima, koje bi trebalo da osiguraju neovisnost pravosuđa i usklađenost zakona i sudske prakse te unaprijeđenje efikasnosti u sudskim sporovima.

U tom smislu, Vlada Kantona Sarajevo će:

- Zastupati princip da niko ne može biti iznad zakona, a da zakon mora biti iznad svakog pojedinca, grupe, organizacije ili ustanove;
- Podržavati zakonsko i finansijsko osiguranje samostalnosti i neovisnosti institucija za provođenje zakona;
- Rad na izradi i provođenju zakona o organizaciji i upravljanju u Kantonu Sarajevo;
- Provoditi reformu javne uprave kroz sistem e-protokol i učinkovitost radnika;

-
- Zahtijevati odlučnu borbu protiv korupcije i kriminala u svim segmentima društva;
 - Podržavati kadrovsko i organizacijsko jačanje pravosudnog sistema te donošenje zakonskih akata koji će unaprijediti rad organa sigurnosti, tužilaštava i sudova i koji će borbu protiv korupcije i organiziranog kriminala učiniti efikasnijom.

7. MINISTARSTVO PRIVREDE

U cilju jačanja poduzetništva, stvaranja što povoljnijeg poslovnog ambijenta za privlačenje i ulaganje domaćih i stranih investicija, te stvaranja povoljnijih uvjeta za zapošljavanje i otvaranje novih radnih mjesta, potrebno je poduzeti sljedeće aktivnosti i mjere:

- Organiziranje redovnih sastanaka sa privrednicima i poljoprivrednim proizvođačima sa ciljem otklanjanja prepreka za razvoj privrede i novih zapošljavanja;
- Provedba Strategije razvoja Kantona Sarajevo;
- Pripremiti prijedloge za investiranje u prioritetne razvojne projekte;
- Stvoriti bolju poslovnu klimu uz niz olakšica za investitore;
- Poduzeti konkretne mjere za jačanje financijske discipline i borbe protiv sive ekonomije;
- Kroz adekvatna rješenja potrebno je osigurati efikasno stavljanje u funkciju privrednog razvoja svih slobodnih površina (putni pojas, šumsko zemljište, industrijske zone, neperspektivna državna imovina...);
- Zakonska dodjela koncesija, te efikasnije ubiranje prihoda;
- Podrška očuvanju starih zanata;
- Aktivno raditi na realizaciji programa razvoja turizma;

-
- U saradnji sa udruženjima poduzetnika i poljoprivrednika u budžetu i programima planirati nove kategorije podsticaja;
 - Uvesti poticajne mjere za pokretanje i razvoj malog i srednjeg poduzetništva, te motivisanje mladih ljudi na otpočinjanje vlastitog biznisa;
 - Kreiranjem budžeta težiti da se dio socijalnih izdvajanja pretvori u poduzetničku podršku;
 - Osigurati pravedan, transparentan i efikasan sistem poticaja u oblasti poljoprivrede i ruralnog razvoja, harmoniziran sa poticajima drugih nivoa vlasti.

8. MINISTARSTVO PROSTORNOG UREĐENJA, GRAĐENJA I ZAŠTITE OKOLIŠA

Poseban akcenat bit će zaštita životne sredine i sistemsko prostorno planiranje, unaprijeđenje kvaliteta života u Kantonu Sarajevo i omogućavanje održivog privrednog razvoja. Inicirat će se slijedeće aktivnosti i mjere:

- Vršiti stalni monitoring u prostoru i kroz pojačan inspekcijski nadzor zaustaviti bespravnu gradnju, koja koči planski razvoj Kantona;
- Izraditi akcioni plan za povećanje energijske efikasnosti u Kantonu Sarajevo;
- Pokrenut ćemo projekte unapređenja energijske efikasnosti objekata radi povećanja korištenja „čiste“ električne energije, radi smanjenja zagađenja zraka.

U oblasti zaštite životne sredine inicirat ćemo slijedeće procese:

- Unaprijediti sistem upravljanja komunalnim otpadom;
- Uspostaviti centar za upravljanje otpadom;
- Nastaviti razvijati sistem odvojenog prikupljanja otpada i reciklažnih dvorišta po općinama, što će stvoriti pretpostavke za otvaranja novih radnih mjesta.

9. MINISTARSTVO SAOBRAĆAJA

U ovoj godini, aktivnosti će biti usmjerene na realizaciju slijedećih kapitalnih projekata u oblasti saobraćaja i razvoja putne infrastrukture:

- Početak izgradnje dionica I i IX transferzale;
- Rješavanje imovinsko-pravnih odnosa i odabir izvođača radova za izgradnju dijela I transferzale na dionici od raskrsnice sa Kranjčevićevom ulicom do petlje Velešići,
- Završetak izgradnje dijela Južne longitudinalne na dionici od II – IV transferzale;
- U saradnji sa višim nivoima vlasti koordiniranje aktivnosti za dobijanje kredita za izgradnju tunela Kobilja Glava.
- Povećanje stepena sigurnosti saobraćaja kroz intenziviranje rada Vijeća za sigurnost saobraćaja;
- Analiza rada prinudne uprave u JKP Gras i prijedlog mjera;
- Iniciranje osnivanja Direkcije za javni prijevoz kao upravne organizacije u sastavu Ministarstva saobraćaja koja će kroz zakonodavni i organizacioni okvir poboljšati pružanje usluge javnog prijevoza u Kantonu Sarajevo.

Prioritetni projekti za izgradnju primarnih gradskih saobraćajnica su I transverzala, Južna longitudinala i IX transverzala. Sredstva koja se planiraju za izgradnju gradskih saobraćajnica iz redovnih prihoda Budžeta Kantona Sarajevo su nedovoljna za realizaciju ovako velikih projekata i planirano je finansiranje ovih projekata iz kredita kao i od finansijskih sredstava F BiH.

I transferzala

Ukupna procjenjena vrijednost projekta I transferzale veća je od 300 miliona maraka, tako da je predviđena realizacija projekta u tri dionice (I dionica: Kranjčevićeva – Bare, II dionica: Bare – tunel Kobilja Glava – Hotonj i III dionica: Hotonj – Jošanica). Do sada je urađena kompletna projektna dokumentacija i procjena troškova izgradnje, pripremanja i opremanja gradskog građevinskog zemljišta za prve dvije dionice. Za treću dionicu je urađena projektna dokumentacija na nivou Idejnog projekta.

Izgradnjom ove saobraćajnice ubrzao bi se protok saobraćaja, skratilo vrijeme putovanja, povećao nivo usluge, povećala sigurnost saobraćaja te u odnosu na postojeće stanje olakšali uvjeti vožnje. Izgradnjom tunela i poddionica ispred i iza tunela, ostvarila bi se veza sa postojećom saobraćajnicom M-18, tako da bi novoizgrađena dionica mogla biti u eksploataciji neposredno nakon završetka gradnje.

Programom javnih investicija Kantona Sarajevo za period 2017. - 2019. godina je predviđena realizacija projekta izgradnje I transverzale, dionica II: Bare - Tunel Kobilja Glava - Hotonj).

Za finansiranje realizacije ostalih dionica, u 2018 godini, započet će pregovori o zajedničkom finansiranju sa Vladom F BiH i međunarodnim finansijskim institucijama.

IX transferzala

IX transferzala je saobraćajnica koja je trenutno izgrađena od Mojmila, preko Alipašinog Polja ulicom Ive Andrića do raskrsnice s ulicom Džemala Bijedića, a planirani novi dio pružat će se do kružnog toka na spajanju ulica Safeta Zajke i Smaje Šikala u naselju Boljakov Potok. Predstavlja jedan od najznačajnijih infrastrukturnih projekata za općinu Novi Grad, jer željeznička pruga predstavlja fizičku prepreku za saobraćaj.

Izgradnjom IX transferzale i njenim povezivanjem sa LOT-om 2C „Sarajevske obilaznice“ Izgradnjom odvojenih kolovoznih traka bi se rasteretio postojeći pravac, znatno povećala propusna moć saobraćajnice na tom dijelu, te samim tim riješilo svakodnevno zagušenje saobraćaja.

Projektna dokumentacija za poddionicu I i poddionicu II je izrađena na nivou Izvedbenog projekta, a kod poddionice III, za Rondo je urađen Izvedbeni projekat, a spoj sa LOT-om 2C je na nivou idejnog rješenja.

Južna longitudinala

Južna longitudinala je saobraćajnica koja se proteže longitudinalnim pravcem kroz veći dio Kantona Sarajevo i to od At Mejdana u Općini Stari Grad pa sve do veze sa saobraćajnicom "Zapadni prilaz gradu" u Općini Ilidža. Prioritetna je izgradnja dionice od II - X transferzale (od ulice Hamdije Čemerlića do ulice Ante Babića). Cilj projekta je da se izvrši kompletna izgradnja na dijelovima na kojima do sada nije realizirana kao i njeno kompletiranje do punog profila na dijelovima gdje je okončana prva i druga faza izgradnje, a sve sa ciljem eliminiranja saobraćajnih gužvi, odnosno poboljšanje saobraćajne veze istočnog i zapadnog dijela Kantona i Grada Sarajeva.

Trenutno je u fazi izgradnje Južna longitudinala na dionici od II – IV transferzale sa izgradnjom kružnog toka na raskrsnici sa IV transferzalom.

10. MINISTARSTVO UNUTRAŠNJIH POSLOVA

Vlada Kantona Sarajevo zalagat će se za cjelovitu i suštinsku reformu sistema kako bismo osigurali efikasnu borbu protiv svih oblika kriminala i korupcije.

Za sistem u kojem će se građani osjećati sigurnije, Vlada će:

- Intenzivirati rad na funkcionalnom i profesionalnom jačanju policijskih struktura u skladu sa visokim standardima, i to kroz primjenu modela 3K (komunikacija, koordinacija, kooperacija), kroz još bolje opremanje, obuku i kadrovsko jačanje policijskih snaga, te kroz podizanje nivoa njihove sigurnosti tokom izvršenja zadataka;
- Težiti smanjenju stope kriminaliteta i stope maloljetničkog prestupništva;
- Fokus koordiniranog policijskog djelovanja trebalo bi da budu počinjena krivična djela kao što su: krađe motornih vozila, zloupotreba opojnih droga i privredni kriminal;
- Poduzeti mjere za uspostavu boljeg stanja u oblasti javnog reda i mira, sigurnosti u saobraćaju (smanjenja broja smrtnih slučajeva u saobraćaju na godišnjem nivou u saradnji sa Ministarstvom saobraćaja) i pojačanog rada policije u lokalnoj zajednici;
- Insistirati na dosljednoj i potpunoj primjeni Zakona o javnom redu i miru u Kantonu Sarajevo i Zakona o osnovama sigurnosti saobraćaja.

11. MINISTARSTVO ZA BORAČKA PITANJA

Časni branitelji Bosne i Hercegovine najzaslužniji su za našu slobodu, za opstanak nas i naše domovine te za očuvanje njenog teritorijalnog integriteta i suvereniteta. Sve vrijednosti proizašle iz našeg odbrambeno-oslobodilačkog rata 1992-1995 plaćene su najvišom mogućom cijenom i stoga ćemo dosljedno istrajavati na njihovom očuvanju te na osiguranju dostignutog nivoa prava pripadnika svih boračkih kategorija u skladu sa njihovim potrebama i maksimalnim mogućnostima društva.

U tom cilju je potrebno da Vlada Kantona Sarajevo inicira i vodi slijedeće aktivnosti:

- Objedinjavanje jedinstvenog registra svih pripadnika OS R BiH
- Podržavanje pravične revizije statusa i prava članova boračke populacije;
- Osiguranje stabilnih izvora finansiranja svih prava boračke populacije;
- Podržavanje projekata samozapošljavanja boračke populacije finansiranjem razvoja malih preduzeća i poljoprivrednih zadruga;
- Zapošljavanje djece šehida i poginulih boraca kroz izradu posebnih programa prilagođenih ovoj populaciji;
- Intenziviranje podrške zapošljavanju članova boračkih populacija i njihovih porodica u svim segmentima društva;
- Rješavanje stambenih pitanja boračkih kategorija;
- Unaprijeđenje zdravstvene zaštite, rehabilitacije i doškolovavanja demobiliziranih boraca;
- Unaprijeđivanje aktivnosti na izgradnji, uređenju i održavanju spomen-obilježja i mezarja šehida i poginulih boraca;
- Adekvatno obilježavanje lokacija stradanja civilnih žrtava rata;
- Izgradnja Memorijalnog centra na brdu Žuč;

-
- Osiguravanje pravne i materijalne pomoći bivšim pripadnicima Armije R BiH;
 - Insistiranje na što potpunijoj implementaciji Zakona o dopunskim pravima boraca;
 - Pokretanje aktivnosti na objedinjavanju i racionalizaciji rada boračkih udruženja.

12. MINISTARSTVO ZA OBRAZOVANJE, NAUKU I MLADE

Vlada će u narednom periodu biti opredijeljena za moderno organiziran, napredan, društveno-odgovoran i kreativan odgojno-obrazovni sistem neopterećen ideologijama, nacionalnim, vjerskim, rasnim ili drugim oblicima netolerancije, obrazovni sistem koji će educirati i odgajati zdrave ličnosti i kompetentne mlade ljude svjesne svojih prava i odgovornosti, svoje pripadnosti domovini BiH, ali i svjesne prednosti naših vjerskih, etničkih i kulturnih različitosti, kao i evropskog konteksta življenja.

Aktivnosti će biti usmjerene na:

- Informatizaciji odgojno-obrazovnih ustanova u Kantonu Sarajevo;
- Kontinuiranu edukaciju nastavnog kadra kao ključnog faktora odgojno-obrazovnog procesa;
- Dokvalifikaciju i prekvalifikaciju kadrova svih životnih dobi, a u skladu sa zahtjevima tržišta rada;
- Stvaranje pretpostavki koje će omogućiti da svaka škola u Kantonu ima kompletnu pedagošku službu (psiholog, pedagog i socijalni radnik);
- Efikasniji sistem učenja stranih jezika u odgojno-obrazovnim ustanovama;
- Veću sigurnost djece i učenika u vrtićima, školama i oko njih;

-
- Povećanje broja vrtića u općinama Kantona Sarajevo radi potpune implementacije Zakona o obaveznom predškolskom odgoju i obrazovanju;
 - Efikasniju borbu protiv maloljetničke delinkvencije;
 - U skladu sa zakonom osigurat ćemo punu akademsku autonomiju UNSA, te pružiti snažan poticaj i podršku njegovoj potpunoj i funkcionalnoj integraciji koja neće gušiti poduzetnički duh i potencijale UNSA, odnosno njegovih organizacionih jedinica;
 - Pružit ćemo podršku naučno-istraživačkoj djelatnosti kroz naučno-istraživačke projekte od posebnog interesa za razvoj Kantona Sarajevo;
 - Sufinansirat ćemo mlade istraživače u okviru doktorskih studija i postdoktorskih usavršavanja te drugih oblika kontinuirane edukacije;
 - Osigurat ćemo veća finansijska sredstva za obnovu i opremanje visokoškolskih ustanova u okviru UNSA kao i za razvoj naučne infrastrukture u saradnji sa privredom;
 - Zalagat ćemo se za bolji studentski standard neophodan za uspješno studiranje, ali i primjeren potrebama studentske razmjene u evropskom i svjetskom akademskom prostoru;
 - Ubrzat ćemo proces internacionalizacije i akreditacije VŠU u KS, posebno međunarodne akreditacijske procese, te time neposredno povećati istraživačku i studentsku mobilnost;
 - Uspostavit ćemo sistem adekvatnih mjera za odlučnu borbu protiv svih vidova korupcije u visokom obrazovanju;
 - Raditi na planu upisne politike na javni univerzitet, koji će primarno uvažavati potrebe realnog sektora.

13. MINISTARSTVO ZA RAD, SOCIJALNU POLITIKU, RASELJENA LICA I IZBJEGLICE

U cilju ostvarivanja socijalne pravde, Vlada će se zalagati za obezbjeđenje jednakog pristupa svim pravima i uslugama iz socijalne zaštite, eliminaciji svih oblika socijalne isključenosti i diskriminacije, obezbjeđenje pretpostavki za ostvarivanje osnovnih funkcija porodice (reproduktivne, vaspitne, zaštitne, ekonomske i dr.). Vlada će se zalagati za:

- Donošenje javnih politika iz oblasti socijalne zaštite,
- Promociju i implementaciju centara za zdravo starenje,
- Realizaciju Strategije razvoja socijalne zaštite s Akcionim planom zaštite,
- Harmoniziranje zakona koji uređuju pitanja iz oblasti socijalne zaštite sa drugim relevantnim zakonima,
- Uspostavljanje jedinstvenog sistema socijalne zaštite koji će imati jedinstvenu bazu podataka korisnika socijalne zaštite.

14. MINISTARSTVO ZDRAVSTVA

U oblasti zdravstvene zaštite stanovništva na području Kantona Sarajevo učinjen je značajan napredak, ali je dostignuti kvalitet zdravstvenih usluga i ukupnu organizaciju zdravstvenog sistema neophodno reformirati.

U tom smislu je potrebno inicirati i provesti slijedeće procese:

- proširiti mrežu Domova zdravlja u Kantonu Sarajevo i približiti uslugu liječenja građanima putem elektronsko-informacionih sistema,
- povećati ulaganja u razvoj savremenih dijagnostičkih kapaciteta javnih zdravstvenih ustanova u Kantonu,

-
- integrirati privatne zdravstvene ustanove u zdravstveni sistem Kantona,
 - jasno razgraničiti radni angažman zdravstvenih radnika u javnim i privatnim zdravstvenim ustanovama,
 - do kraja definirati primarnu, sekundarnu i tercijarnu zdravstvenu zaštitu u cilju racionalizacije sistema i poboljšanja zdravstvenih usluga,
 - potpuno jasno i prihvatljivo za sve građane odrediti kretanje bolesnika (put pacijenta) kroz zdravstveni sistem, smanjiti "lutanja", skratiti čekanja, umanjiti troškove zdravstvenih usluga te pružiti pacijentima blagovremenu uslugu liječenja,
 - uspostaviti protokol u liječenju i postupku sa pacijentom,
 - raditi i dalje na poboljšanju statusa zdravstvenih radnika,
 - odlučno i beskompromisno povesti borbu protiv korupcije na svim nivoima zdravstva i provoditi kontrolu kvaliteta rada,
 - utvrditi precizne uvjete za zdravstvene ustanove u kojima se provodi praktično obrazovanje učenika i studenata medicinske grupacije srednjih škola i fakulteta,
 - stalni rad na esencijalnim listama lijekova (A, B i C) i tražiti sniženje njihovih cijena,
 - provoditi konstantnu prevenciju, od obaveznih mamografskih, ginekoloških pregleda za žene kao i stomatoloških za djecu uz pronalaženje mogućnosti zakonskih rješenja uređenja ove oblasti. Tu je i edukacija građana u smislu promoviranja zdravih stilova života, važnosti planiranja porodice, zdravlja mladih i borbe protiv ovisnosti o svim vrstama opijata.

15. ZAKLJUČAK

Na osnovu prezentiranih smjernica i ciljeva rada nove Vlade u ostatku mandatnog perioda u 2018. godini, ovom prilikom molim da podržite predloženi Program rada i sastav Vlade, te da zajednički osiguramo ostvarenje većine zacrtanih ciljeva.

Ovu priliku shvatam kao veliku obavezu i odgovornost da vodim Vladu u veoma turbulentnim političkim prilikama u izbornoj godini sa specifičnim odnosima vladajuće koalicije na različitim nivoima vlasti.

Ukoliko mi ukažete povjerenje, u ostatku mandatnog perioda, zalagat ću se za izvršenje predloženog programa rada Vlade sa zacrtanim osnovnim projektima i ciljevima na čijoj će realizaciji biti usmjerena posebna pažnja premijera i svih ministara u Vladi Kantona Sarajevo.

Adem Zolj